

欽定大清會典事例

欽定大清會典事例卷二百一

戶部

漕運漕糧改折

漕糧改折○順治初年定起運漕糧例不改折間有被災地方准其暫時折解○八年題准漕糧改折後百姓有先期完納本色者准抵下年漕米仍於下年應徵本色內照數扣徵折色○又題准漕折銀即應起解如該地方官有意延緩者按分數叅處○又題准江浙兩省被災除一二三分者不必議折外應以四五六七分為

輕災每石折本色六斗折色四斗八九十分為
重災每石折本色五斗折色三斗其折色漕米
每石折銀一兩四錢○九年題准各省因旱災
改折其江南江西浙江每石折銀一兩五錢山
東河南每石折銀一兩二錢○十年題准本地
被災改折糧額不必復於鄰邑撥補起運○十
七年題准漕糧內向有給軍辦運灰石之米因
停辦灰石米仍運通嗣後改折銀兩即徵解戶
部聽工部按年支取備辦灰石以應工程之用
○十八年題准漕糧改折止許照價徵收如仍

藉兌漕為名濫行科索者即行叅處○又題准漕運遇有改折其隨漕輕齎席木贈截等銀照數徵解○又題准起運漕糧正米一石例有耗米並給軍行月贈耗等米如遇改折一例按照時價折徵○康熙八年題准河南省漕糧遵賦役全書每石折銀八錢○九年題准浙江省嘉湖二府被災每米一石折徵銀一兩○十年題准江蘇省蘇松常等府被水糧米每石折徵銀一兩麥每石折銀四錢○十一年題准江蘇省沭陽海州地瘠民貧漕糧每石折徵銀八錢○

十六年題准河南省粟米價賤每石於八錢內節省銀一錢五分解部餘銀六錢五分辨運○五十八年議准河北附近水次等府州縣粟米每石令民間上納節省銀一錢五分其餘六錢五分即徵本色起運至不近水次之州縣仍照舊例八錢折徵○雍正元年

諭浙省杭嘉湖所屬被災十四州縣額徵漕米三十二萬石朕恐荒歉之歲民間納米為難著令徵收一半改折一半其改折之價著照康熙九年例每米一石折銀一兩又念被災之後所交米色未能純一其十

六萬漕米著令赤白兼收。○六年題准河南省去水次稍遠之府州縣均徵收本色。惟南陽汝甯二府屬縣河南府屬盧氏嵩永甯三縣及光汝二州並屬縣又離水次最遠之靈寶閿鄉二縣額徵漕糧路遠難運共酌減米萬五千六十二石有奇均免辦解分撥內黃濬滑儀封考城等五縣協辦於五縣地丁銀內扣除完漕照部價每石八錢以銀六錢五分辨運節省一錢五分徵解糧道補項其南汝等府屬每石折徵銀八錢解司以抵濬滑等五縣地丁銀數。○七年題准

江蘇省通州漕糧兌給狼山營兵米將附近水次州縣南米改抵通州漕糧○九年

諭浙江杭嘉湖三府今歲小有蟲災米粒稍碎不能完漕應令減價折收以示體恤著照雍正元年四年之例每石以一兩折徵解部○十一年題准山東河南兩省額徵粟米內改徵黑豆十二萬石運供在京官兵並支應理藩院賓館等處牧馬之用一應起卸均照漕例遵行○乾隆二年

諭江南淮揚一帶於今冬大濬運河自運口以至瓜洲計程三百餘里分隸淮安府之山陽揚州府之江都

甘泉高郵寶應五州縣管轄將來築壩開工之後舟楫難通民間輸納漕米需用車驢陸運未免竭蹶又淮安府之鹽城阜甯二縣與山陽接壤向於淮城內外交倉兌運則納漕與山陽等五州縣無異朕心深切軫念江南所屬漕糧雍正八年十一年有改徵折色每石納銀一兩之例著將今歲山陽等七州縣應納漕糧照此例改徵折色○又題准江蘇省昭文縣薛家沙地劃歸通州管轄應徵漕米三百八石有奇照通州漕糧之例均留充狼山營兵餉其應運之米在於昭文縣南米內改抵補額○又

題准河南省臨漳縣減徵黑豆。統作米數折徵解部。應需黑豆。仍於應徵本色漕米內徵運。○又題准江南省蘇常鎮揚太倉通六府州屬額徵之麥。向給運軍行月二糧。遇有餘贖。易銀解部。但各屬產麥稀少。買交不便。嗣後隨漕徵米給軍。餘贖每石易銀九錢造報。○又覆准豫省漕糧米豆。向因各府州縣以水次遙遠。運兌維艱。酌給腳價。令各州縣運至水次交兌。但祥符等三十一州縣原給腳價多寡參差。不敷所用。嗣後每石每里給銀八毫一絲六忽。於隨漕耗

米及原定腳價銀內動支。若仍不敷於節省銀內增補。餘贍節省銀解部。其永城等十九州縣離水次更遠。將額徵米豆折銀。令州縣選役赴水次採買兌運。○又題准江蘇省嘉定寶山二縣額徵漕米例係長折。今起運白糧已改徵漕米四千九百二十六石。其長折漕米亦照數改徵本色起運。○又題准山東河南兩省改徵黑豆不敷支給於河南粟米內再改徵二萬石。山東粟米內再改徵四萬石。○三年題准江西省贛州府屬甯都縣原額起運漕米因距省稍遠。

兌運維艱。先經題定留抵兵米。將奉新等縣兵
米解省。抵作漕米。今甯都縣新升漕糧正副米
二石四斗七升二合。照例徵解贛縣。抵作贛縣
應徵之兵米。即於贛縣額徵兵米內。如數扣米
解省。抵作甯都縣升增漕糧。仍於奏銷各冊分
析造報。○四年

諭聞海州及贛榆縣素不產米。漕糧皆採辦於鄰郡。今
年二州縣被水稍廣。民力未免艱難。其成災地畝應
徵漕糧。聽該督撫查勘題請蠲緩外。至勘不成災之
處。民力亦覺艱難。著將本年應納並上年緩徵漕糧。

均准其折色。每米一石折銀一兩。按數交官起解。免其購運。以紓民力。○又

諭聞贛榆縣地瘠民貧。又值連年被災。若將未被水之田應徵漕糧。照本地交納粟米例一併改徵折色。俾多留米穀於瘠邑。庶民食不致匱乏。○又題准河南省改徵黑豆。係於各州縣應徵粟米內派徵。永城等十九州縣折徵粟米。購買維艱。採辦之米。於祥符等州縣徵解。以祥符等州縣應收之豆。於永城等州縣採買。○七年題准江西省瀘溪縣折徵漕糧。向定折價八錢。不敷採買。嗣後於

每年八月。借司庫存公銀。發該縣及時採買。按
照買價。徵銀還項。○又題准江蘇省海鹽榆二
州縣。應徵漕米。嗣後照江西瀘溪縣之例辦理。
○又題准湖北省通山當陽二縣僻處山陬。不
通舟楫。漕糧難於兌運。嗣後改徵折色。官為採
辦。每石連腳耗定價一兩二錢五分。○八年題
准江南省嘉定寶山二縣。應輸漕白二糧。向係
折徵。官為採辦。每年十月定價派徵。至十二月
採買時。價長落不一。難免贏縮參差。改照江西
瀘溪縣例。每年豫動庫項購買。覈明買價。出示

徵收。○又題准山東省附近青州州縣粟米徵
運青州支放兵糧。其改徵黑豆州縣仍徵粟米
兌運。將扣存兵米價銀採買黑豆運通。所需運
青不敷腳價以及隨漕幫貼等費。統於米折銀
內動給。○九年題准河南省粟米內再改徵黑
豆二萬九千三百五十六石六斗六升有奇。○
又題准河南省改徵黑豆。頻年加增。其永城等
州縣購辦之豆不必於祥符等州縣改徵粟米。
即照數徵豆起運。○十一年題准河南祥符等
四十州縣額徵粟米內。每年改徵小麥萬石。同

漕米黑豆一同徵收。運通交納。由倉場侍郎轉運內務府收用。其運赴水次。應需腳價。令該撫照舊每石徵收節省銀一錢五分。以資運費。自乾隆十二年為始。照數改徵起運。○十四年題准江南省沭陽縣完漕粟米。買自東省陸運。維艱。嗣後准其採買糙粳兌運。○又題准江南省甯國。旌德。太平。英山。四縣漕糧。向係民折官辦。每年豫估。派徵官為措銀墊辦。於官民均有未便。嗣後照海。贛。三州縣之例。先動司庫銀及時採買兌運。將用過銀數。按米計算。照數徵收歸

款○十六年

諭京師官兵牧養馬駝需用黑豆甚多。豫東二省向為出產黑豆之地。自雍正十年以來。已於二省漕糧粟米內節次改徵。每年合計額解黑豆二十萬九千餘石。以供支放八旗馬駝之用。該省小民至今稱便。但現在豫東二省額徵運通粟米。尚有三十七萬餘石。計支放官兵俸餉外。每歲多有餘贍。似可再為酌量改徵。以裨實用。著該撫等於額徵粟米內。各按地方情形。視其出產之多寡。分別實數。每歲再改徵黑豆一二萬石。同從前改徵黑豆一例兌運。在豫省多留

此數萬石之粟米。既可以資民間口食。而京師黑豆價值。亦可不致昂貴。僅加徵黑豆。於閭閻完納漕糧。實有未便之處。亦即據實陳奏。不必勉強從事。欽此。遵。

旨議定。東省牘河內外有漕州縣。向皆出產黑豆。前經改徵黑豆。完漕之時。以豆抵米。糧戶樂輸。應將泰安萊蕪肥城東平東阿甯陽金鄉濟甯汶上。陽穀荷澤濮鄆城單范觀城朝城聊城博平。茌平莘等二十一州縣。就其產豆多寡。區別定數。曉諭完糧五升以上之花戶。令其米豆兼收。共

改徵黑豆三萬石。同應徵粟米一例依限徵完。
交兌運通。至豫省地方。粟豆兼產。豆多粟少之
區。粟價常昂於豆價。今自本年為始。於應輸粟
米內。改徵黑豆二萬石。將額徵粟米。照數除抵。
至漕糧每石。向有節省銀一錢五分。徵為運赴
水次腳價之用。亦仍照前徵收。以資運費。○十
七年題准。湖北省通山當陽二縣。折徵漕糧。向
係連腳耗徵銀一兩二錢五分。近因米價日昂。
歲加賠累。應照江西瀘溪之例。借動道庫隨漕
銀兩採買。照價徵還歸款。○二十年議准。江蘇

省被災州縣粳米每石折銀一兩粟米每石折銀七錢五分各州縣衛本折細數造冊送部○二十三年

諭豫省乾隆二十二年緩徵漕項米麥豆石均予折徵以示體恤○二十四年

諭浙江杭屬之仁和錢塘湖屬之烏程歸安長興德清武康等處應徵乾隆二十年及二十三年緩漕正耗米七萬一千餘石准其改徵折色○二十六年議准江蘇省清河桃源宿遷沭陽四縣地不產米嗣後照民折官辦之例先動司庫銀兩按照時價

採辦令民輸銀還款○又議准浙江省於潛昌
化富陽新城四縣地居偏僻辦漕零星小戶准
其照十月時價按數徵銀官為辦兌並於易知
單內開明時價不得絲毫浮冒○三十四年奏
准京倉存豆無多將豫東二省應運粟米改徵
黑豆十二萬餘石○三十六年議准江蘇省阜
甯縣產米無多應令民折官辦其採買腳價悉
照清河等縣成案辦理○三十七年奏准京倉
豆石足敷支放粟米一項覈計不敷自乾隆三
十八年為始將舊徵豆十二萬餘石照例徵收

其續徵豆十二萬餘石。仍徵粟米起運。將來倉
儲豆少。再為酌改。○又議准江蘇省海州。贛榆。
清河。桃源。宿遷。沭陽。阜甯。七州縣民折官辦漕
糧。嗣後無論時價低昂。總以每石二兩作為定
價。一律徵收。於秋成時。令各州縣赴司領銀。按
照時價採買。覈實報銷。如有贏餘。解存司庫。留
為下屆採辦價昂添補之用。○四十一年議准
湖北省江夏。嘉魚。漢陽。黃陂。孝感。雲夢。應城。七
縣。每年餘贍耗米一千七百八十九石零。係易
穀附入常平。以之撥抵通山。當陽。二縣漕糧。實

為妥便。所有該二縣應徵折色。酌定每石徵銀一兩四錢五分。永遠遵辦。銀兩解存司庫。遇常平倉需用。酌量市價買補。○五十一年議准。江蘇省海州。贛榆等七州縣。照二兩一石之數。民折官辦。時多掣肘。嗣後照嘉定。寶山二縣之例。每年十月內。按照時價詳定。由司領銀採買。起運漕米。照上米購辦。行月照中米購辦。同例銷牙用運腳。一併覈實於民戶攤徵。十一月內起徵。次年二月以前徵完。隨時解司歸款報銷。○五十三年議准。河南。山東二省。照歷年採辦之

例於附近水次州縣糧價平賤時各買豆三千六百石在起運漕船內均派搭運以備大通橋置辦官車餵養牲口之用儻遇價昂報明停止價平買補以符定額○五十五年議准豫東二省續行改徵之粟米十二萬石復改徵黑豆運通所有大通橋車戶每年承買黑豆七千二百石即於改徵豆內承買其山東河南二省採買豆石即行停止○五十九年

諭東省本年濟南武定等府州屬春雨愆期麥收歉薄今當秋雨優霑之後廣種二麥民間需用麥種較多

著將本年應徵麥石改徵米石俾小民便於輸納○
嘉慶八年奏准江蘇省泰興縣地不產米且漕
倉遠設泰州不通舟楫將該縣額徵漕糧兵月
等米照阜甯清河桃源宿遷沭陽五縣之例改
為民折官辦秋成時探明鄰境價平米多之處
赴司領價採買兌運用過價腳等項據實報銷
照數徵解還款○十六年奏准山東省麥收歉
薄本年應徵麥石暫行徵收粟米以免費米易
麥之艱俟來歲麥收豐稔仍照舊徵麥運兌○
十八年奏准湖北省崇陽通城荊門沔陽江陵

公安石首潛江天門江陵監利等州縣漕米向
係解赴漢口交兌該州縣地處上游距兌漕水
次較遠輓運不易嗣後與下游武昌興國蕪水
蘄州廣濟羅田等州縣解京南米互相抵兌各
就附近水次解交餘贍南糧仍令徑解京倉節
省水腳銀兩報解充公其給旗截貼銀米及南
糧鼠耗狼撒修倉鋪墊馱腳背夫並挑運腳價
分別造報覈銷○又奏准山東省歷城等二十
五州縣麥收歉薄應徵麥石暫行改徵粟米○
又咨准安徽省甯國旌德太平英山四縣漕糧

民折官辦。照桃源等州縣成案。採買漕價。按年造冊報銷。○十九年奏准。豫省黑豆收穫短少。所有額徵黑豆一十五萬五千九百五十石零。暫行改徵粟米一半。其餘一半。照常徵收。○二十一年

諭漕糧歲輸天庾。為國家惟正之供。例係徵收本色。有漕州縣勒收折色。向干嚴禁。現值年豐穀賤。若令小民以賤價糶穀。交納折色。是閭閻終歲勤劬。所得升斗大半糶以輸官。以有限之蓋藏。供無窮之腹削。其為病民實相倍蓰。著通諭有漕省分各督撫。轉飭所

諭

屬徵收糧米概以本色交納毋許勒折滋弊如有專利虐民者即據實嚴參毋稍徇縱○道光二年

各省徵收漕糧禁止折色功令綦嚴若州縣官勒折買補米色必多撓雜著通諭有漕省分各督撫嚴飭該州縣於收漕時親自驗明米色隨時兌收儻查有開徵數日即行封倉勒折自用賤價買補及旗丁折兌濫收情弊即據實嚴參懲辦毋稍瞻徇至各省設立糧道督辦收兌是其專責若令兼署他缺轉致本任拋荒嗣後即責成該管糧道等專司稽查該督毋得另行委署別缺致有曠誤以專責守而重倉儲○

三年定安徽省甯國旌德太平三縣民折官辦
漕糧於道光四年為始每年就附近產米地方
按照時價於司庫正項內領銀採買漕米照上
米行月照中米購辦兌運其運腳確計道里支
給將米價及耗費運腳等項一併按米計算覈
明每石應輸若干先行給銀採買以十一月為
限出示曉諭按數起徵儘有浮收立即參辦次
年二月徵完還款如逾限未解即將經徵接徵
各職名分數隨同丁地錢糧奏銷時另冊開叅
按照未完分數議處○四年奏准江蘇省清河

桃源宿遷阜甯海鹽榆沭陽嘉定寶山等九州縣並安徽省甯國旌德太平等三縣民折官辦漕糧兵米每年十月內按產地時價詳定漕糧照上米行糧月糧並甯旌太三縣兵米均照中米借領司道庫儲銀兩分別購買起運其買米價銀及例銷牙用運腳合計每石需銀若干由各該撫出示交縣徧諭民戶於十一月內照數攤徵次年二月以前分解還款如有浮開價腳並地方官扶同捏飾等弊分別究叅○又奏准安徽省英山縣並江西省瀘溪縣漕糧亦准民

折官辦。每年於開徵時。由司道確訪時價。先動公項銀兩。給發購買兌運。將用過銀兩。按米覈明。出示徧諭里民。照價輸納歸款。○五年

諭。漕糧為天庾正供。徵收本色。由來已久。改收折色。易滋弊端。所有江蘇安徽浙江湖廣折漕一節。已降旨毋庸議。並將該督撫變價歸公。及本折兼收之議。概予駁斥。仍令江西省再行妥議。尚未奏到。現當秋穫登場。各省將次徵收。漕米喫緊之時。若耽延時日。不早定議。恐不肖官吏。藉端影射。舞弊病民。所關甚鉅。著通行曉諭。有漕省分。各督撫所有應徵漕糧。仍照

向例徵收本色。毋得藉口折漕。致滋擾累。○六年奏
准。山東省歷城等二十七州縣。麥收歉薄。不堪
兌運。暫行改徵粟米。○又奏准。豫省惟南。汝。光
等屬。麥收豐稔。其餘有漕之五十三州縣。夏間
被旱。除應徵白麥。照舊徵收外。所有本年應徵。
並帶徵各年漕麥。暫行改徵粟米。○又奏准。每
歲運通粟米。不敷支放。而豆石積有贏餘。本年
豫漕項下。應徵正改兌耗豆十一萬二千二百
九十餘石。內改徵粟米十分之二。○七年奏准。
山東省額徵黑豆十三萬九千餘石。酌改徵粟

米二成○二十九年

諭前據李星沅陸建瀛先後具奏南漕改折流弊易滋
諸多窒礙各等語當交原奏王大臣等會部議奏茲
據悉心覈議具奏應如該督撫所請毋庸議折本日
適據耆英奏到南漕暫緩改折一摺朕詳加披閱折
漕之議原因外省州縣折色過重徒充私橐轉絀正
供因力求變通令各就往年徵糧實數酌減徵收期
於興利除弊既據該督等以種種格礙難行分析陳
奏惟恐不肖州縣借折色之名抑勒倍取是便民之
舉轉致病民亦不可不防其漸所有各省漕糧著准

其仍照舊章辦理。毋庸分成議折。○咸豐元年

諭。御史張祥晉奏江蘇新漕請量地改收折色一摺。據稱太倉等屬各州縣產米素少。民間向納折色銀兩。由地方官購米兌交。請飭令毋庸購米。即將折色銀兩解部等語。著陸建瀛楊文定按照摺內所陳各情悉心體察。是否可行。籌議具奏。欽此。遵

旨議奏。明年海運業已定議。若僅將太倉州屬另行改折。似多窒礙。請將太鎮嘉寶四州縣本年新漕循舊徵辦。一律歸於海運。俟來年體察情形再行定議。○三年

諭前據戶部議奏江廣等省咸豐二年應徵漕糧由官折價解京民間完納悉仍其舊不許以折銀之議向民間更改舊章藉口浮收勒折已降旨依議行矣第恐戶部原奏閭閻未能周知各屬州縣或藉口折價愚弄小民以為科斂地步致生事端著湖南湖北江西各督撫按照部議剴切出示曉諭俾窮鄉僻壤皆知此次新漕仍照舊章完納由地方官自行變價解京與民無涉僅不肖官吏有藉詞私改章程及浮收勒折等弊即行嚴叅懲辦並著各督撫將此旨及戶部原奏一併刊刻徧行宣示咸使聞知○又

諭孫瑞珍慶祺奏海運米石尾數請折價交納一摺江蘇省漕白糧米由海運至天津除現已驗收八十萬五千四百餘石其未到漕米一萬八千四百餘石尾數無多該尚書等請照京倉折放米石秬米每石一兩四錢之數飭令蘇松糧道折價交納派員解部俾該糧道迅速回任趕辦來年新漕著即照所請行○又覆准江蘇省各屬徵存漕米其道途稍遠各州縣每石變價折銀一兩覈算以昭畫一惟正供之外仍有耗米及應徵漕項米銀各款仍應劃出另算責令各州縣按數徵解備充軍餉以

免牽混。○又議准江西湖南湖北安徽等省漕糧因河道梗阻折價解京抵放。但計正耗米一石四斗。不計貼運。由官折解。其價以例載京倉折給之數為準。稜米一石折銀一兩三錢。梗米一石折銀一兩四錢。以貼運耗米及州縣津貼運丁幫費辦解。自屬有贏無絀。所有民間完納一切悉仍其舊。經徵官員不許以折銀之議向民間更改舊章。浮收勒折。如有驚擾百姓致滋事端。將州縣叅究。該管上司捏情掩飾。按例治罪。○又議准漕糧折銀解部。所需解費即在貼

運幫費之漕項內覈實支給。照地丁例作正開銷。仍應撙節動用。所餘銀兩隨時報部另案覈辦。○又議准應解漕折銀數及委員起程日期。先行報部查覈。其折解銀兩分作兩起。頭起限於來年正月二起限於三月。全數解部。逾限據實叅辦。○四年

諭前據英桂奏河南省應運咸豐三年漕糧因運河梗阻請將粟米麥豆均按每石一兩二錢五分析銀報解聽候採買。當經戶部以京倉米石不敷支放奏令運道稍通即速催運北上。茲復據戶部覈議基溥等

所奏請將豫省漕糧折銀作為採買之本等語。該省每年起運漕糧例限於三月初一日抵通。現在時日已遲。而河道仍多梗塞。京倉支絀。採買米石最關緊要。著英桂、鄭敦謹督飭糧道將本屆應運北耗米麥豆石按數折銀。除薊糧項下應撥保定等處兵俸等米一萬五千餘石。照例定每石八錢之數劃出。徑解直隸藩庫外。其餘並著按照戶部所議全數批解到部。以備採買資本。並將輕齎銀款一併照例解通。該撫等務當迅速妥辦。毋任稍有延緩。致誤要需。○又奏准江蘇省江淮等屬應徵咸豐三年漕糧與

安徽省一律易米解銀。由官糶變。稔米每石折銀一兩三錢。粳米每石一兩四錢。粟米每石一兩二錢。所需解費。即以贈米漕費貼補。不准另請開銷。其折解銀兩。按照奏定章程。分作兩起。頭起限來年正月二起。限於三月全數解部。違者。據實叅辦。應徵漕項等款銀米。除貼併辦解外。其餘節省彙數解京。其向係解道轉給者。除有船在次。准支減半月糧外。其餘一併解部。不得仍存道庫。至海州。贛榆。沭陽。桃源。清河。阜甯。宿遷等七州縣漕糧。仍令該督等查照舊定。每

石二兩四錢之例一併徵收報解○又奏准河南省應運上年漕糧無分粟米麥豆按每石一兩二錢五分析銀報解聽候採買所有例定每石節省銀一錢五分並輕齋等款仍循例報解

○七年

諭河南漕糧應徵粟米本年間有被旱受傷之處若令照常徵收未能一律圓淨准其酌量改徵小麥數成仍照定額兌運以昭覈實○八年改定湖北漕務章程一有漕州縣向來本折兼收今明定折價每石自四千文起至六千五百文止其水腳耗米

一併在內。嚴飭各屬。不准於此外多收分文。以示限制。所有由單串票據米差費等類。概行革除。一折收北漕。照部定每石一兩三錢之數。共正耗銀二十一萬四千餘兩。並津貼幫丁兌費六萬八千餘兩。均解交糧道庫。暫行提充軍餉。一各州縣折解南糧。每石酌定一兩五錢。共應解銀二十萬六千五百餘兩。除支發滿漢各營兵食外。尚餘銀八九萬兩。存留藩庫。備災緩撥補之用。一漕南折價。民間輸將自易。毋許各州縣稍有帶欠。至將來運河修復。仍設法辦解。本

色。應令隨時體察情形覈辦。○又議准湖北省
旗綠各營兵米係由各州縣供支。本折兼解。現
在漕糧改折。該二營亦應盡支折色。所有各州
縣應解旗綠各營米折銀兩。改解道庫。由糧道
具報巡撫委員咨解荊州將軍衙門支放。綠營
即由各營赴道具領。至旗營兵米例定二百六
十日支本色。一百日支折色。現因旗營積欠未
清。生計艱窘。於二百六十日原支本色今改折
色者。准於例價七錢外。每石加銀二錢。按九錢
覈給。其向支折色及綠營兵米折銀均仍照例。

定七錢之數折支。○十一年定山東省牘內五幫漕糧變價。照咸豐三四兩年成案。無分粟米麥豆。每石折銀一兩四錢。應將前項折銀。並同節省漕項銀米等款。全數解部。○同治元年奏准河南省有漕州縣。多被匪擾。所有應運漕糧。准其折銀完解。嗣後不得援以為例。其水程盤剝等項銀兩。並著一體報解。不得短少。勒限於四月內全數解部。○又奏准河南省各州縣漕糧。每石改折價銀三兩三錢。○又議准河南省折漕各州縣。每石以銀三兩三錢解司。由司以

二兩解部以一兩留充軍餉所餘三錢作該省辦公之用。二年定各省收漕州縣將紳民應完糧額一律均收不得有大戶小戶名目印官親駐倉廩秉公監兌責成該管道府嚴密稽查儻有搢紳巨戶包攬強交代納及官吏浮收折色等弊從重究辦道府瞻徇該督撫一併查叅

○四年

諭前因曾國藩李鴻章奏請將江蘇太倉鎮洋二州縣漕糧改徵折色當交戶部妥議具奏茲據該部遵議覆奏漕糧為天庾正供定例不准輕議改折近來江

西湖北等省。雖有改徵折色之案。亦出於一時權宜。究非經久之法。況江浙所運粳米。堅緻耐久。尤非江廣諸省之稷粟可比。非此不足以供儲蓄。且江浙漕額。業經加恩分別酌減。計每歲減運之米。已不下七十萬石。即使全漕起運。京倉所入。已大減於前。自不應再議改折。致倉儲復形短絀。即謂太倉鎮洋二州縣。產米較少。而該二屬向徵正耗米九萬餘石。今已減去賦額三分之一。止徵耗米六萬餘石。民力已紓。自應照常起運。以符舊制。所有該督撫請將太倉鎮洋二屬改徵折漕之處。著毋庸議。○又議准江西省

漕糧一律折收制錢。由官易銀解兌。每漕米一

石。

計正改兌正米。及加四。副米兩項。內除貼補各州縣一三。副米外。一律折收。易銀解部。

折收足錢三千文。萬安樂平二縣。每石加錢二

百文。○又奏准江西省折漕。每石解部銀一兩

三錢。該省如有實在需用之捐款公費。每漕米

一石。另提銀二錢。在解部款外。餘贍丁漕數內

供支。○又奏准江蘇省蘇松常太四屬本色收

漕。每石餘耗以三斗為率。折色收漕。每石折價

年內以四千五百文為率。年外以五千文為率。

徵收地漕各款條銀。每兩折價以二千文為率。

該督撫務於每年十二月底將各屬年內徵收本色若干折色若干緩至年外徵收者若干截清數目專案奏報。儻該督撫等並未奏報有案。即悉令按每石四千五百文完納。不准加收分文。其收本色者每石加耗米三斗。收條銀者每兩折價二千文。亦令各屬永遠遵守。不准絲毫浮溢。至或交本色或交折色。仍聽民便。毋許任意勒折。及故意挑剔。挨延。儻查有前項情弊。即由該督撫從嚴叅辦。○又奏准江西省漕糧改折。自開徵之日起。分限加價。第一月為初限。不

加第二月為二限。每石加價銀五錢。三限以後。每石加價銀一兩。○五年奏准。本年蘇松各屬米價較平。今屆冬漕。應完折色。每石折收制錢三千二百文。加公費錢一千文。其完本色者。裁去餘耗米三斗。亦改交公費錢一千文。如遲至年外。仍無分本折。加收錢五百文。○七年議准。江西省折漕州縣。以錢易銀解支。不敷。以向收制錢三千文者。改收銀一兩九錢。向收制錢三千二百文者。改收銀二兩二分。以一兩三錢解部。以二錢七分提充本省捐款公費。餘為各州

縣辦公之用。○又議准江西省完糧各戶率多
疲玩非逾限加價催科實無把握應將加價數
目改為二三兩限每限各加銀三錢仍將各屬
開徵日期及每屆一限已收未收漕糧總數專
案報部其按限加價銀兩酌提八成歸公二成
給予州縣。○又議准江西省隨漕徵收各款漕
項錢糧與腳耗銀兩俱係循例另徵惟腳耗米
石係與正耗統徵自改折以來除腳耗內坐支
銀米仍歸州縣支用外其餘漕項腳耗等銀俱
係節省報解充餉又給丁贈扣米石自同治五

年以後凡係節省一律報解充餉。腳米每石折解銀一兩。○又奏准江蘇省丹陽金壇溧陽三縣被災較重應徵錢漕按畝折收錢文。除酌提各該縣辦公經費外其餘全數易銀解司。以一半採買米石。隨同正漕起運赴津交納運費等項。悉於此內開銷。以一半收入地下。分別正耗撥餉支用。○又議准江西省漕米軍興以後每石折收銀一兩九錢。嗣因銀賤錢貴改為每石折收錢三千文。萬安樂平二縣加錢二百文。本年銀價漸長。州縣收錢易銀不敷支解。每石漕

米仍折收銀一兩九錢。萬安、樂平二縣加銀一錢二分。又議准江西省徵收漕糧分限加價二三兩限。每石各加銀三錢。○八年奏准江蘇省丹陽、金壇、溧陽三縣應徵漕糧抵徵錢文。以八成買米二成充餉。○十二年議准江西省漕折照同治四年原定數目。於每石收錢三千文及三千二百文之外酌量加收錢文。毋庸徵收實銀。其所加錢文即視地丁每兩加錢二百文之數覈計。不准再有浮溢。俟銀價平減即照原定錢數折徵。至逾限加價一節照江蘇折漕案。

內逾限加價章程。年內毋庸加收。年外交錢
五百文。仍不得稍有浮多。並令該撫仿照江蘇
辦法。將已徵未徵各數。於年底截清奏報。以憑
查覈。○十三年奏准江西省徵收折漕。每石連
留支公用改收錢三千四百二十文。萬安樂平
二縣加收錢二百十六文。年外交納仿照江蘇
成案。每石加錢五百文。

欽定大清會典事例卷二百二

戶部

漕運 漕糧運船 白糧運船

漕糧運船

謹案南省漕糧向由運河北上。自咸豐元年。各省幫船受兌開行。未能趕

符定限。二年。遂將江蘇蘇松等四府一州糧米。由海運津。其餘仍行河運。乃重運船隻。直至運

河已凍。尚未全數抵通。於是浙江亦請改辦海運。三年。長江運河俱形梗阻。有漕各省。率皆改

徵折色。因之漕船漸次無存。洎同治三年。始有江北漕糧雇備民船運送通倉之議。蘇省旋亦

力圖規復河運。第漕船經過山東地界。一千數百里。中多阻滯。不能不劃分成數。河海並運。其

船隻則改由各糧道自雇民船運送抵通。茲將嘉慶會典所載漕船數目。詳識於左。以備稽考

馬。○各省漕船原數萬四百五十五號。直隸三

山東千五十四。江南江安糧道所屬四千八百八十七。蘇松糧道所屬六百四十八。浙江千九百九十九。江西千有二百。湖廣八百二十六。內除漕糧折銀徵解。及灰

石改折。並分載帶運。及坍荒田地應蠲漕糧裁

減船數外。以嘉慶十七年實運船數計之。共六

千二百四十二隻。直隸三十七號。協運河南山東八

百八十七號。內漕船三百六十一。自備船一百八十五。運本省者六百四十六。協

運河南者二百四十一。江南江安糧道所屬二千六百九

十六號。內協運河南九十七。蘇松糧道所屬五百二十二

號。浙江八百四十五號。江西六百三十八號。湖

北一百八十號。湖南一百七十八號。河南無出

運衛所。係派撥直隸山東江南幫船就近協運。

○江南運白船一百三十八號。在通省漕船內三年抽調一次。

浙江百二十一號。乾隆七年題定。在於嘉興湖州二衛所幫內。撥定長運白

糧。

○順治初年定。奉委修造漕船各官。或詐報

朽爛。或修造未竣。報稱已完。或將朽爛船冊報

掩飾者。皆降二級調用。承造官推諉不行監造。

或不能依限完竣者。各降一級調用。該管官督

催不力。及朽爛船不估價申報者。均罰俸一年。

○十二年覆准。貼備造船。江甯各衛屯米。每石

協濟銀三分。黃快船。每丁協濟銀五分。官舍餘

丁編為三則。上則納銀五錢。中則納銀三錢。下則納銀二錢。審定造冊徵收解廠。安慶衛以屯田勻配上下兩運。公同貼造。新安宣州二衛。按屯田編徵貼造。建陽衛於屯丁銀內加徵貼造。廬鳳淮揚徐滁等衛。蘇太等衛所及山東各衛。均按清出丁舍編徵貼造。浙江按清出閒丁。每丁徵銀四錢。江西每丁徵銀二錢五分。湖廣每丁徵銀二錢。以供貼造。若船多銀少。儘數勻攤。○又覆准。僉造漕船。除額給料價外。將各衛所舍餘閒丁。按年編審納銀。為幫貼之費。○十四

年議准。成造漕船。例有軍三民七。

造船料價。例於州縣民地

徵十分之七。衛所軍地徵十分之三。

並減存行月等銀供用。東省

所增新糧。應需船載。仍於額設銀內撥補成造。

○十五年議准。湖北省修造漕船。所給料價。官

役高下其手。竟非原數。不得不私派幫貼。嗣後

應令官修官造。以蘇軍困。○又題准。各省新升

漕糧。運船不敷。例動輕齎銀雇募民船裝載。令

各省豫為題請補造。○十八年題准。各省新升

漕糧。酌令每船灑帶外。其餘撥減船代運。○康

熙四年題准。漕船僉造之年。如有衛所官帶領

運糧軍戶勒索幫貼等弊。該督撫嚴禁。有違犯者。指名題參。○又題准。造船屯軍不僉不解。責在府廳衛所。解軍不造。責在糧道。該督撫指名題參。○又覆准。嗣後漕船十年限滿。必須查驗確實。應造者造。應修者修。仍將每年修造船若干。造冊題報。又須總漕親驗。實係不堪出運者。方許改造。儻有可用舊船。不驗明駕運。該督撫查實題參。其有過號漕船。自行造買赴廠領銀者。概行禁止。○六年定。新船不能出運。雇募民船。以致虧折米石者。旗丁杖徒。運官罰俸一年。

○七年題准。漕船改造。司漕之官親驗。如有仍可加修再運者。即於歲徵造船料價內量給加修銀。仍令載運。照年扣算。○九年覆准。楚省軍三料價。因漕不起運。裁充兵餉。今楚漕現在復運。自應照舊編徵為造船之用。毋得將別項動用。○十三年議准。漕船十年滿號。舊例照額船數目。凡額船十船。每年成造一船。嗣後如滿號之船。尚可加修出運。仍令其加修出運一二年。迨至朽腐不堪。准其成造。不必泥於加一之數。○十七年題准。漕船載米不過四百石。入水不

過六捺。空船以四捺為度。○十九年題准。造船料價。既有額支之銀。其清出丁銀。概飭解部。○又覆准。定例。停運漕船。雖然限滿。未經運糧。仍令加修出運。○二十二年題准。各省漕船。載正耗米共五百石。土宜六十石。○二十六年題准。各省漕船。仍照各衛所現運船數。成造十分之一。○又題准。各省歲修銀多寡不同。今酌中畫一。通漕一例。每年出運一船。給修費七兩五錢。○二十七年題准。各省修船銀。定例在糧道庫內支給報銷。其江安蘇松等處修艍銀。向係各

衛官軍。於過淮時。造報總漕批給。今酌議停其
解淮。統歸糧道給發。其天津通州二處三修銀
在通濟庫內支領。○三十二年定。漕船截留。支
過三修銀兩。已供修船之用者免追。○三十四
年覆准。江西省漕船。每船隨帶百石小船一隻。
過百石者不准隨帶。○又題准。運船不足。不早
為僉丁補造。又不設法雇募者。降一級調用。經
管僉造漕船不力玩誤者。罰俸一年。衛所官解
送漕剝船遲誤朽爛者。罰俸一年。○又題准。各
省升糧過多。停其灑帶。總漕將升科米數。豫先

題明撥船載運。○五十二年題准。回空船如遇
煞壩濬淺。未經進口。給銀修艤。俟開壩飛輓受
兌。○又題准。江西湖廣兩省漕船。以十丈為率。
短不得過九丈。其寬深丈尺。酌量合式。○雍正
二年議准。各省漕船料價。安慶新安宣州建陽
金山鎮江蘇太鎮海等衛。並江西各衛所船。向
例給各軍料價。在本地方設廠成造。湖廣各衛
所船。定例糧道將料價分發武昌漢陽二糧廳。
在於武漢二廠成造。其江淮興武廬州鳳陽滁
州淮安大河徐州揚州儀徵等衛船。於江甯府

及淮安清江等廠成造。浙江各衛所船。於仁和錢塘二廠成造。山東各衛所船。於淮安山東廠成造。均隸船政同知管理。其料價銀。除動支額編民七軍三料價銀外。儻有不敷。或動關稅。或動減存漕項。並支贍行月銀。或動輕齎及蘆課銀。均漕臣臨時題請撥補。今船政同知既經裁革。應統歸糧道管理。令運軍支領料價。赴廠自行成造。所有不敷料價。即於道庫減存漕項銀內動支。其蕪湖淮安杭州等關額供造船銀。飭令解部。○又覆准。糧船到次。立即給銀修艤。如

運軍有事故者。即著該船舵工修艙。儻有遲誤。以及虛領錢糧不修艙者。總漕即將糧道監兌押運衛備等官題參議處。所領修艙銀。仍著落運軍賠補。○又定。各省漕船蓬桅矮小不堪者。監造各官題參議處。仍將不堪之蓬桅勒令照式賠換。○三年覆准。漕船料價。令糧道如數親給。如有侵扣等弊。總漕將糧道等官題參議處。侵扣之銀。嚴追入官。○又定。配造漕船。仍用舊料。及灰艙未密。閒用雜木者。守備監造等官題參議處。所侵料價。追出另造。○四年題准。湖北

湖南兩省現運漕船。俟運十年。一例請造。其餘各省。仍每年照十分之一。咨部請造。○又題准。山東省不產極木。每年應造漕船。先期造冊報部。隨給價豫往南省購辦。如有木料不堅實者。令糧道賠造濟運。○又題准。各省現存漕船數目。准部行令徹底清釐。今按江興廬鳳等衛。原額漕船三千六百六十五號九分。內灰石改拆分灑帶運。及減存船四百五十五號九分。此外尚有新安等衛。永減荒減積缺。暫減輪減等百八十三船。現運三千二百十船。江西十四幫。原

額一千有三船。內除併造減淺七十四船。止存九百二十九船。又有減存積缺二百二十一船。實在現運七百有八船。蘇太等衛原額六百四十八船。內灰石灑帶減存一百有四船。現在實運五百四十四船。浙江額船照上年冊開。原奉單派千五百五十八船。內灰石灑帶減存三百四十三船。現在實運千二百十有五船。湖北漕船。現在實運二百二十八船。湖南原額一百八十二船。現皆實運。山東原額自備七百三十一船。內輪流減存二十三船。共實運七百有八船。

內自備船三百十有二號。又協運河南原額三百二十七船。內輪流減存三十九船。現在實運二百八十八船。天津右衛所原額自備旗船十九號。內灑減船二隻。實派出運自備十七船。通州右所自備船二十號。嗣後各省漕船將實在現運船數。作為定額。內除運軍自備船。例不給料價。及湖北湖南現運漕船。俟運滿十年一例請造外。其餘各省現運漕船。每年將滿號之船。均照十分之一。咨部請造。如有可以加修出運者。仍令加修出運。不得冒請成造。○五年奏准。

催漕船按汛成造。每船給銀三十七兩六錢三分三釐。於稅課銀內動支。又別於茶果銀內。每歲支給小修銀二兩。十年期滿。照例別造。○八年題准。排造漕船。給過料價。取具各弁軍並無需索剋減印甘各結。送部覆覈。仍俟前項糧船過淮時。令總漕親驗。○又題准。山東及江南之盧鳳等衛。成造漕船。定例將舊船解廠充作裏料。如並無底板解廠者。交銀五十一兩。○又題准。江西省滿號漕船。不堪加修者。准其在北拆賣。改造剝船。將價銀解交糧道。驗給親造。○九

年

諭江南江淮興武二衛運軍名下。有應追鑽夫底料銀十萬八千一百餘兩。此項自康熙四十二年至雍正元年。前後共二十載。各軍僉替更換不一。現今著追之人。未必係當日領米之人。其力既不能完。未免有所掙累。且今承追接催各官。叅罰累累。有礙考成。亦可軫念。朕思雍正三年以前。掙欠錢糧之各案。正在清釐豁免。而運軍效力漕儲。尤朕所加恩體恤者。著將江興二衛。應追造船夫役及底料銀。悉行豁免。以示朕恩恤運軍之至意。○又題准江興二衛。因無贍

運屯田。又無什軍幫貼料價。不敷製造。造船夫役及底料銀。仍應照從前支給之數給發。除鑽夫銀五十兩。原無增減。其底料銀以十分計算。每分銀五兩一錢。若無底料者。全給銀五十兩。有奇。或有底料不足。則照不足分數補給。在徵收餘丁協濟銀內。動支奏銷。○又題准。河南山東兩省減存七十四船之內。量存三十船。以備各本省升科新漕撥補之需。其餘四十四船。停其製造。又揚州衛二幫。減存六十六船之內。留三十二船。其餘三十四船。即行停造。每船追底

板銀五十一兩解部。○又題准。回空漕船無需
雙桅。舊例令運軍賣桅木一根。雍正三年奏准
禁止。嗣仍准賣桅木一根。以資路費。○又覆准。
漕船蓬桅什物。嚴禁通州木廠。不許串通盜賣
盜買。○十年覆准。初次出廠之年。概不支給修
艖銀。惟江南省累年獨支。嗣後停其支給。畫一
遵行。○十一年覆准。各省滿號漕船。令糧道先
期請造。豫備物料。原船到次。即時興工。儻隱匿
不造。及請造遲延。將衛備叅革。如將舊船掩飾
及造不如式者。將監造官衛備運軍究擬追賠。

糧道不親驗。及徇隱不揭者。一併叅處。○十二年覆准。湖北省漕船將屆歲造之期。該撫將解部漕項銀。豫年於季報冊內酌定數目。登明留備。暫存道庫。按限盤查。至漕船輪造之年。糧道於豫年冬兌時。將各季報冊內存留數目。彙繕清冊。同該年應造軍船清冊。申送總漕。總漕於重運漕船過淮驗看後。即覈明送部覈覆。該撫接准部覆之後。將所需物料先期完備。原船到次。立即興工。其動用銀。仍入各年漕項奏銷冊內。具題覈銷。○又題准。修造漕船。擅自買補捏

報完工。及私雇民船出運者。將該衛備及運弁
叅革究擬。○又定。各省應造船隻。各該糧道將
接頂丁名。並船隻數目。確查明白咨部。如蒙混
造冊遲誤重運者。將糧道題叅。總漕不行詳查
一併議處。○乾隆五年覆准。漕船遇有事故應
賠造者。回次之時。即遵例賠造。儻有藉辭減歇。
違至次年興造者。將督催衛弁照例題叅。○又
覆准。歲造新船。當年不支三修銀。惟各省賠造
之船。當年仍支。嗣後一律停給。○六年題准。湖
廣糧船。向俟通幫限滿。一齊修造。運料鳩工。不

免草率。易於朽腐。嗣後嚴飭衛備運軍。務遵定例按式成造。並飭糧道詳驗。總漕於過淮時覆驗。如有造不堅固。出運七八年朽腐者。據實題叅。○七年題准。山東省自備船。係運軍雇募修艚兌運。不給三修銀。但各軍先期定船。修艚無力。酌定每年雇船。先於該軍應領折色月糧內。每船先發銀八兩。以資修艚。如遇減運。於各軍應支四分之一。苦蓋月糧內扣抵。○八年題准。湖北省適遇截漕減歇。所有減存九十餘船。於乾隆九年按限配造。○又覆准。嗣後賠造之船。

務照軍船式樣成造。儻有短窄及板木不堅厚者。將監造官弁及糧道題叅。○又題准。湖廣省漕船滿號之年。總漕於重運回空時。親加驗看。擇其堅固者加修。出運一次。准其留通變賣。五六年事故賠造之船。於足運後細加查驗。如實係堅固。令其再運二次。咨部請造。舊船留通變賣。儻賠造足運之船。已經朽腐。該軍希圖二運之後。可以變賣。捏報堅固。該管官查驗不實。擅准出運。總漕即嚴叅究處。○又題准。山東省各幫。於額運漕船之外。向設量存船三十號。留備

漕糧新升及不時撥補之用。今應裁汰。儻有新
升漕糧。照自備運船之例。雇船運送。○九年題
准。留通變賣之船。沿途遇有失風事故。旋已修
造堅固。將米分於通幫代運抵通者。其船如即
在途次變賣。將千總照例議處。○十年覆准。浙
江省紹興前後兩幫漕船。向係加一成造。緣奉
十年滿號一例報造之文。不能符合加一之數。
嗣後每幫每年留歇八船。將米分各船加載。遞
年輪運輪歇。以符歲造加一之數。其輪歇之船。
即以滿號留存配造。不准支給三修。○十一年

議准揚州衛二幫量存船二十四號。原屬虛糜曠設。理應裁汰。因江興二衛有貧疲軍船。將江興三七八幫。查明實屬貧疲軍船。照數裁減。即將揚州衛二幫應裁之船。留存抵補。○又覆准湖北湖南兩省買補足運之船。俟抵通交糧之後。留通變賣。所賣價銀。令坐糧廳就近驗明。封交隨幫攜帶回次。由糧道驗給各軍。為增造新船之用。○又覆准浙江省紹興前後甯波前後等四幫漕船。向係加一輪減。將米分灑各船加載。以符歲造加一之數。惟甯波後幫每年滿號

船隻贏絀不一。未符加一輪歇之數。嗣後遇滿號過多之年。應加一輪減在次配造。遇滿號不足加一。將未經滿號。修費浩繁之船。暫減一年。下年仍行起運。年滿報造。○十二年覆准。江興二衛幫軍貧疲。將漕船千一百八十四號內。查明實屬貧疲不堪駕運者。按照加一裁減。裁船底料。照例變價。並將裁船應得之行月漕贈銀米。分給存運各船。以蘇軍困。○又覆准。廬州衛三幫輪減漕船。與揚州衛二幫量存輪運船。事屬相同。全數裁汰。以省糜費。將裁船照例變價。

○又定。向例賠造足運船隻。如係堅固。再運二次。滿號漕船實係堅固。再運一次。如有買補民船足運後。請加修出運者。將違例之道衛等官查叅。○又定。向例漕船七八運有事故者。責令買補。如有例應買補之船。並不照例辦理。派入減存。將衛備罰俸九月。○又定。湖廣漕船。照例用樟櫓等木。如十年滿號之船。混用柏木成造者。將所造之柏木船隻。本年暫令出運。責令下年賠造。將違例之衛備降二級調用。○十三年覆准。湖北省漕糧。比湖南省少八百餘石。漕船

多於湖南四十六號。船多米少。每船應得耗米水腳等項較少。事例既不盡一。運軍未免偏枯。將湖北裁汰四十八船。存船百八十。均裝額運漕糧。仍將各船應運漕糧應贈銀米各數目。造冊送部察覈。裁船底料。照例變繳報部。○又覆准。江廣二省失風漕船。如果不堪岸修。該地方官弁據實查驗。出具並無捏飾各結。呈報總漕咨部。准其拆板變價。其變價銀令地方官覈數封固。交該幫運弁呈明該省糧道驗發。○十四年覆准。徐州衛河南後幫歲造漕船。向在淮安

清江浦船廠成造。駕赴河南衛輝水次兌糧。惟程途遙遠。恐誤兌限。今酌定在臨清設廠成造。凡遇滿號之年。令各軍於歲前自備價銀。並飭弁軍先行購料。俟准造之日。照例於江安道庫銀內給料價成造。○又定。各省漕糧。遇有截留災緩暫減漕船。應將減存船數另冊造報。如有漏造者。將該道職名查叅。○十六年議准。河南省後幫船。在山東省臨清塢所成造。河南省前幫船。在江南省夏鎮地方成造。應需工料。令該丁自行購買。○十七年定。各省漕船僉造遲延。

至開兌之時尚無丁無船者。經僉之員降一級調用。同知罰俸一年。○又定。各省漕艘未經足運。遽詳請呈造者。糧道罰俸六月。○又定。各省減歇漕船。不及時詳請僉造。致逾限年久者。糧道罰俸九月。○十八年定。滿號漕船。例應裝運交糧。回次後興工成造。如有以恐誤造船之期。遽行雇募者。將衛千總叅處。○二十年覆准。浙江省嘉興衛所幫額船四十九隻。杭州衛頭幫額船五十五隻。以船多糧少。幫丁貧疲。照甯紹等幫之例。將滿號船隻加一輪減。留次成造。糧

灑通幫裝運漕截錢糧。按糧分給各丁。○二十一年覆准。各省滿號船隻減存之日。即令概行拆卸。聽候配造。○二十三年議准。湖廣滿號漕船。照江西之例。留通變賣。每船存銀六十兩。令倉場封付。隨幫帶交糧道驗給各丁。以資成造新船之用。○又定。嗣後各省成造漕船。其已滿出廠年分。因減歇未足十運。而木植朽爛。必須成造者。報部酌議。各該糧道。毋得濫行詳請。○二十四年奏准。湖南省地處最遠。回空漕船。十二月歸次。已屆冬兌冬開之期。領銀修艚。為時

太迫。嗣後責令糧道於每年十月。將各軍應得運費。每船先給銀五十兩。委員迎至湖北之田家鎮。等候給發。令其買補蓬纜等物。一至漢口。即鳩工沿途修船。赴次兌漕。○又定。湖南省漕船十年大造。及事故賠造。俱係衛備之責。但荊州等衛守備相隔寫遠。不肖旗丁得以自由。嗣後湖南各衛成造漕船。俱令各該幫千總監督。或不能堅固如式。將千總衛備一併叅處。○又定。各省滿號漕船不堪修運者。即行報造。如果驗明尚堪加修。即取具修固各結送部。毋得濫

行詳請。○二十五年覆准江西省南昌衛。凡遇
運軍成造漕船。每船新造給銀六百五十兩。遇
失風事故應賠造者。給銀三百兩。買補給銀二
百兩。雇募給銀一百六十兩。袁州衛。新造給銀
四百兩。賠造一百兩。買補八十兩。雇募六十兩。
贛州衛。新造給銀一千兩。賠造三百兩。買補一
百六十兩。雇募一百兩。如遇拆壘給銀三百兩。
信豐所。新造給銀一千兩。賠造三百兩。買補二
百兩。雇募一百二十兩。如遇壘造給銀三百兩。
會昌所。新造給銀八百兩。賠造一百六十兩。買

補一百兩。雇募八十兩。南安所。新造給銀九百兩。賠造三百兩。買補二百兩。雇募一百六十兩。吉安建昌兩所。新造給銀三百兩。賠造一百兩。買補八十兩。雇募六十兩。永新所。新造給銀四百兩。賠造八十兩。買補六十兩。雇募四十兩。安福所。新造給銀四百二十兩。賠造買補雇募於餘存屯租內分別酌給。撫州所。軍分城屯。屯軍每船新造給銀五百兩。賠造一百兩。買補八十兩。雇募六十兩。城軍每船新造給銀四百兩。廣信所。新造給銀六百五十兩。弋陽貴溪二縣所。

轄船隻。新造給銀八百兩。賠造一百兩。買補八十兩。雇募六十兩。鉛山所。新造給銀八百兩。賠造一百六十兩。買補一百二十兩。雇募八十兩。饒州所。新造給銀四百兩。賠造買補雇募於存贖屯租內分別酌給。○二十六年題准。湖北省荊州左右衛運田。沔陽衛運班二田。每逢漕船大造之年。均照運費按數加徵造費。荊州左衛。每船給造費銀六百兩。右衛。給造費銀四百八十兩。沔陽衛。給造費銀四百兩。如係赤丁。每船給造費銀四百五十兩。○二十八年議准。長淮

原宿州等衛幫輪減船隻。雖係按年輪減。實屬閒運。應一體裁汰。安慶衛前後兩幫輪減船二十二隻內。裁汰十一隻。仍存十一隻。以備僉造。浙江甯波衛前後幫。紹興衛前後幫。金華所輪減船隻。改為長減。杭州衛頭幫。海甯所嘉興衛輪減船隻。仍加一輪減。○二十九年奏准。江蘇浙江山東河南等省買補船隻。滿號之年。留通變賣。○三十一年議准。江南省徐州衛江北幫歲造漕船。向在江甯設廠成造。今改於夏鎮地方造辦。其料價及購買木料。悉照河南前後兩

幫成例辦理。○四十一年議准。岳州衛屯田。遇
十年大造。加徵造費。每船撥給造費銀三百九
十二兩三錢五分。○又議准。成造漕船。定有查
驗九法。一驗木。毋雜惡質。毋間舊料。二驗板。康
板厚五寸。塘浪底板厚二寸。挖泥腳棧棧板厚
一寸七分。下墨時查驗鋸路。解板下鋸。如比較
分寸不合程式。即行究換。三驗底。淺船底長不
過五丈二尺。中間闊不過九尺五寸。鋪底驗量
尺寸少差。即勒令改造。四驗樑。淺船龍口樑闊
不過九尺。高不過一丈四寸。使風樑闊不過一

丈四尺。斷水樑闊不過九尺。高不過五尺。一不合式。即勒減削。五驗棧。淺船棧長七丈一寸。深三尺六寸。六驗釘。用釘之法。一尺四釘。逐眼稽查。內外審視。如有匿釘不用。及虛派釘眼。而眼內無釘者。立即究治。七驗縫。合板時查驗板邊俱淨。縫口細合。不得稍有隙漏。八驗艙。法以斧入鑿。以鑿入麻。縫滿然後固以油灰。如有麻少縫闊。不能受灰。及油少灰生。旋上旋落者。立即究處。九驗頭梢。鐵葉扒鋸攀護頭梢者。不許短少。鋪頭鋪梢裏料。不許濫惡充數。監造各官。均

照成法詳加審驗。○又議准各省成造漕船。每船額給料價銀二百八兩七錢七分有奇。其江南之江淮興武二衛。仍給鑽夫銀五十兩。底料銀五十一兩。○四十二年議准浙江省處後處前金衢杭二杭三甯後台前湖州所等幫。均係糧少船多。每幫每年加一輪減。將滿號之船留存在次。以待配造。不給三修銀兩。應裝米石。於現運船內分派加裝。漕截銀兩。按糧分給。○又議准山東省德左任城二幫。共軍船六十七隻。改為自備。其變價底板銀五十一兩。即為備船。

之用。免其追繳。將來遇有事故。另僉別丁。於各丁應領津租贍軍銀十兩之內。每年每丁扣存銀五兩。如更換新丁。即將歷年扣存銀五十一兩。發交新丁。以作備船之用。如七八九年及九年以外。遇有易換。每船每年止扣銀三兩。扣足五十一兩之數。即行停扣。○四十六年議准。安慶衛現在丁民成熟屯田六百八十四頃。自本年為始。每年每畝貼造費銀五分。共貼造費銀三千四百二十兩。分給新造十一船。每船可得銀三百餘兩。以為助造工料之用。○四十七年

題准。徐州衛河南後幫。向於臨清塢所成造。其
前幫獨遠在夏鎮。今改於臨清胡家灣設廠施
工。如借用民地。每畝給賃價四錢。○四十八年
議准。徐州河南前幫造船。其廠次支給減半月
糧。以資造費。○五十年

諭各省漕運船身高大。固為慎重天庾起見。但一遇暴
風。往往有沈溺傷損之事。究因船身過於高大沈重。
掉輓維艱。人力難施所致。即其尋常輓運。加絳過牕。
一切照料浮送。亦覺甚難。況幫船每隻運米不過五
百餘石。商販船隻載米至千百石者。其船尚不及漕

艘之半。現在豫東二省漕船尺寸。即較他省為小。南漕各船。自可量減船身尺寸。使行駛便利。雖一時未能全事換造。自可於各該船屆臨拆造時。將高寬尺寸。仿照民船量為減損。則船身便捷。既可少意外之虞。而行走並能迅速。於漕運實有裨益。著傳諭漕運總督。會同有漕省分各督撫。將各省漕船。或經行江湖。或僅由內河行走。酌量情形。悉心籌畫。酌定船式尺寸。詳悉妥議具奏。欽此。遵

旨議定。江浙漕船。船身長八丈。寬一丈五尺。底長五丈九尺。兩廂兩棧共深六尺。天篷高二尺八寸。江

廣漕船。船身長九丈五尺。寬一丈六尺五寸。底長七丈二尺。兩廂兩棧共深六尺九寸。天蓬高二尺八寸。大桅頭桅亦俱收低。至天蓬上安設牌樓樣檣欄杆等項。一概除去。並將喫水尺寸刊明棧板之上。俾易於查驗。於本年為始。將滿號船隻。照新式成造。每船給料價銀二百八兩零。船身覈與從前舊制並無減小。仍照向例支給。其未滿號船隻。俟十年運滿。如式成造。自願先行改造者。一律辦理。嗣後成造時。監造各員出具印結。道員加結送部。如違式成造。旗丁治

罪。道衛各官嚴叅議處。○五十五年議准甯波前後紹興前後杭嚴三四嚴州所温州前等八幫現屆十年改造。又雇募民船出運。丁力不無賠累。於本年冬運為始。免其雇募米石分灑通幫輓運。每船加裝五十餘石。其漕截負重等銀隨糧灑派通幫。行月銀米。留給本丁添作木價等費。○五十七年議准處州前後嘉興湖州台州前後金衢温州後杭嚴頭二海甯等十一幫年滿船隻均多朽腐。於五十六年冬運為始。免其雇募。照甯紹等幫之例一體辦理。○五十八

年議准。浙江省漕白各幫。按照加一輪減。惟嘉興衛一幫額船十七隻。遞年輪減二隻。統計十年之內。少船三隻。以本年冬兌為始。將應造之船輪減存次。未經年滿者。不准輪減。僅滿號船隻係在加一之外。仍照定例加一輪減配造。如滿號僅止一隻之年。應輪減一隻。若無年滿之歲。毋庸輪減。○五十九年議准。湖南省荊州衛加徵津銀二千六百四十兩。該衛漕船三十三隻。每年共需銀一千三百二十兩。統計十年。應積銀一萬三千二百兩。嗣後每屆造船一隻。於

道庫積存銀內給銀三百兩。在屯止徵造費銀一百八十兩。○又議准。浙江省成造漕船。於本幫額領錢糧內貼公借銀三百兩六錢。春夏之交。先期請領。於各丁行月項下扣繳。○嘉慶元年奏准。山東省德州等幫。向無漕船。該丁自赴直隸雇船裝運。豫省漕糧輪免船二百七十一隻。減歇東省水次。除豫省應運密雲保雄兵米船三十二隻外。其餘船隻儘數撥給東省兌運。如再不敷。仍令自雇。○又定。各省漕糧已奉蠲緩。無需糧船出運。旗丁等滿號應造船隻。俟下

年再行給料成造。其九運雇募等船。亦俟下年照例雇船接運。○五年奏准。江西省屯田租銀。信豐所。每造船。加給造費銀三百兩。每運每船。加給銀六十兩。每船大修。加給銀五十兩。通共每年加給銀一千四百二十五兩。並該所運船。遇有風火事故。例應賠造者。加給銀三百兩。買補。加給銀一百六十兩。雇募。加給銀一百二十兩。所有加增新造大修銀兩。仍照原議缺溢流抵。造入奏銷。至該所歷年餘存銀三萬八千餘兩。自本年為始。將借墊南昌九江。贛州。會昌等

衛所銀兩。照例扣還。增給信豐幫船。○八年奏准。浙江省溫後等五幫成造漕船。自嘉慶七年冬運起。量為停造船一十八隻。其應運米石。照數按幫帶運。至各船應支行月等項銀米。按款攤給各丁。以紓丁力。其停造拆缺船隻。每船照例變價銀五十一兩。呈繳道庫。○十年奏准。江西省建昌所新造船隻。每船額給造費三百兩。不敷辦公。每造一船。加給銀五十兩。在該所歷年餘租銀內增給濟造。按年入冊報銷。○十一年議准。河南省每年額運白麥一萬石。需船二

十隻。在於平山前後。臨清前後。徐州前後等六幫。遞年專幫輪運。○十五年奏准。江西湖廣兩省軍船。船身笨重。喫水較深。原長九丈五尺。改為九丈。兩廂兩棧。原深六尺九寸。改為六尺六寸。上裝牌樓柱收低三寸。船底原長七丈二尺。改為七丈。並恐土宜運具等項難以攜載。將每船原帶一百石小剝船。改為三百石剝船一隻。以資分裝。儻新造軍剝船隻。私放寬大。希圖多帶貨物。將成造之衛備領運之千總叅辦。失察之糧道。一併議處。○十七年

諭。浙省每年成造漕船。每船應得造費銀二百八兩零。今該省造船賠累。著加恩照江廣置造剝船之例。每船除例給銀二百八兩零外。再添給銀五百九十餘兩。計每船共領銀八百兩。即於裁船減存行月款內動撥。以紓丁力。○二十三年奏准。江興二衛十八幫額船九百六十一隻。運丁快丁各半分僉。其快丁捐貼運丁代辦者。逢造之年。貼造費銀三百兩。以助工料。共可領銀七百餘兩。足敷辦造。惟運丁自運之船。遇造領價銀四百餘兩。實滋賠累。嗣後每造一船。酌加銀三百兩。以資造費。○

又奏准。長淮頭幫額運漕白船四十九隻。每造船一隻。共支銀三百七兩零。不敷成造。每船酌給造費銀一百五十兩。即於江興等幫每年餘存息銀內動給。各幫不得援以爲例。○道光三年覆准。山東省造船。向係南省購買木植。給予減半月糧。道光二年。該省請造漕船四十五隻。六船在本省採買。三十九船赴江甯購辦。所有就近購料之六船。支過減半月糧。飭令按船追繳。○又奏准。嗣後淮安頭二兩幫。每船酌給津造銀一百五十兩。天長縣。每船酌給津造銀二

百四十兩。每年隨同料價。由江安糧道衙門覈給。○五年覆准。建陽衛甯太幫料價銀兩。業經放給。因屯田被淹。無力添辦。該幫應兌漕糧。因災蠲緩。將該九船派入災減。展至來歲成造。並將各該丁購買木植堆存處所。取結報部。其苦蓋月糧。一律給發。○六年覆准。揚州衛儀徵幫漕船。係道光五年輪造之艘。因糧歸海運。緩至六年成造。嗣後應造之船。毋得率行請緩。○二十七年

諭。江南大河衛前幫永兌淮糧。丁貧屯薄。造船本屬賠

累雇造並舉。丁力更覺難支。所有大河前幫九運軍船。准其援照成案。免其雇募。按照加一留次配造。糧灑通幫裝帶。其應支行月漕贈等項銀米。分給造運各丁請領濟運。九運事故船隻。亦著照成案加一輪減免雇。以紓丁力。○同治三年議准。江北各屬停運有年。漕船久廢。現在清淮軍需捐款內。動銀購米二萬石。雇備民船。由河道運送通倉。○五年奏准。江北新漕辦理河運。雇募民船。必須優加體恤。船戶樂從。方可行之久遠。嗣後每米一石。給水腳及神福犒賞等款銀六錢。並於回空時

裝載貨物。免交北稅。由漕督給照稽查。示以限制。○六年奏准。江蘇省辦理河運。雇備商船。酌加水腳。以恤商艱。

白糧運船。○順治十年覆准。漕糧有官造漕船裝運。而白糧每至臨期。雇募民船。未免稽遲時日。嗣後照漕糧之例。攢廠造船。給發州縣兌運。

○十一年欽奉

恩詔。白糧民解累民。官解仍以累民。今後於該省漕船分帶。以省官民之累。○十二年覆准。白糧令漕船灑帶。責之民。則仍加苦累。責之軍。則分身無暇。嗣

後照舊仍令官運。○十七年覆准。白糧運至丁字沽起剝。緣漕糧先行。白糧繼後。每年凍阻。故於丁字沽剝運。今漕白兼行。無分先後。自應與漕船一例原船抵通。不許仍於丁字沽換剝。永著為例。○十八年題准。將減存漕船解運。○康熙三年覆准。浙江省白糧用漕帶之法。需船百二十六號。除六十二號於漕幫內抽出裝運外。增造新船六十四號。併入漕幫僉運。○十四年覆准。江南省蘇松常等府白糧。照浙江之例。抽選漕船運送。每船裝運五百石。擇軍船殷實堅

固者。抽選裝運。五年一次更換。○四十二年題准。蘇松常三府白糧。於回空無欠之江淮興武等十一幫內。無論已運未運。揀選殷實運軍。堅固漕船。五年一次輪運。毋致違誤。○五十六年題准。停止輪運。○雍正四年題准。白糧運費多於漕糧。仍照舊例。於通省漕船內抽選堅固者。並累年無欠殷軍。公同掣運。五年一次更替。如有挂欠。即捆打革運追賠。照監守自盜律治罪。○乾隆元年題准。江南運白糧船。例於通漕船內抽選。五年更替。但五年之內。運軍消長不常。

致有軍力漸疲。運船朽壞之弊。嗣後於每年未
兌之先。責令糧道赴次察驗。如運軍力疲。船不
堅固者。別選殷軍補運。○二年覆准。蘇太松常
四府州原運白糧二百九十三船。今減徵白糧。
改徵漕糧。應減白糧船百五十有七。仍令兌漕。
實起運白糧船百三十有六。蘇州府前幫二十
有九。後幫二十有六。共船五十有五。應歸併一
幫。松江府四十五船。為一幫。常州府三十六船。
為一幫。船數適中。應仍其舊。○又題准。浙江省
原額白糧內改徵杭米。即以原運白糧之船。領

運改徵之米。嘉興府屬白糧幫七十六船。以三十八船運白。三十八船運杭。湖州府屬白糧幫五十船。以二十五船運白。二十五船運杭。下次以運杭之船更換運白。運白之船更換運杭。各半分運。遞年輪換。○七年題准。浙江省白糧幫船。於康熙四十三年題定五年抽調。因該省運白各軍。挂欠頻仍。別軍懼累。不願抽調。以致累年並不遵行。至雍正十三年。行令仍照康熙四十年之例。但漕白各幫。均不願紛更抽調。嗣後浙省白糧。照舊撥定軍船。永遠運送。免其抽

調。○十六年奏准。江南省運白各船。原議於通
省漕船內抽選兌運。五年更換。但為期未免太
久。嗣後江蘇運白船。定為三年抽調。仍照例於
通省漕幫內遴選軍殷船固。累年無欠。以及並
未運過白糧者。抽換兌運。○四十二年議准。浙
江省嘉白幫。每年加一輪減。將滿號之船留存
配造。不給三修銀兩。其應裝米石。於現運船內
分派加裝。漕截銀兩。按糧分給。○五十四年覆
准。浙江省湖州白糧幫額船四十五隻。糧少船
多。改照嘉興等幫之例。將每年滿號船隻遞年

加一輪減存次配造。以免雇募賠累。所有輪減白糧。派令運白各船灑帶。改漕米石。派令運漕各船帶運。白糧經費。米折錢糧。照額給發。行月錢糧。全行節省。○五十六年議准。嘉湖二白幫運丁素屬疲難。年滿船隻。均多朽腐。雇募民船。賠累難支。於乾隆五十五年為始。免其雇募米石分灑通幫。負重等費。隨灑派給。行月銀米。留給本丁添補成造。○道光三十年奏准。江蘇省蘇松常太三府一州。應徵本年白糧正耗米七萬二千石有奇。改由海運赴津。○咸豐元年奏

准江蘇省蘇松常鎮太五府州漕白糧米一律改由海運赴津。○二年奏准運河現已凍合。浙江嘉白等幫尚未報入東境。來年新漕受兌。必至貽誤。嗣後改由海運以期迅速。○四年議准浙江省杭嘉各幫來歲不能出運。停泊東境空船共四百六十六隻。時經三年之久。自不能照常堅固。應將咸豐三年之修艚銀兩發給各該幫丁趕緊修理完整。一俟江路肅清即行催令歸次。○五年議准浙江省回空幫船阻泊東境久未歸次。與其停泊河干。虛費帑項。不若擇其

年分較遠將次鈔朽者。迅即詳細奏明。拆板變價。以節經費。